

ՏՆՏԵՍԱԳԻՏԱԿԱՆ ՀԱՐՑԵՐԸ «ՊՍԱ» ԵՎ «ԱՐԱՔՍ»
ՊԱՐԲԵՐԱԿԱՆՆԵՐՈՒՄ

ՈՐՐԵՐՏ ՍԱՐԻՆՅԱՆ

XIX դ. հայ տնտեսագիտական մտքի գլխավոր ուղղությունները մի ուղղուն համապատասխանություն ունեին հասարակական հոսանքների սոցիալ-պատմական բովանդակության հետ: Այս տեսակետից միանգամայն որոշակի են տարբերակվում տնտեսական զարգացման վերաբերյալ այն ուղեգծումները, որ առաջադրում էին հասարակական հոսանքներ ներկայացնող «Մշակ», «Մեղու Հայաստանի», «Նոր-դար», «Մուրճ» և «Արձագանք» պարբերականները: Սակայն կային նաև բազմաթիվ այլ պարբերականներ, որոնք թեև չունեին ամբողջական ու վերջավորված ուղղություն ու թերևս աչքի չէին ընկնում սոցիալ-տնտեսական կյանքի խոր ու համակողմանի վերլուծության մեջ, այնուամենայնիվ, զբաղվում էին ժամանակի առաջադրած խնդիրների արժարժեքներով, որոնք և լրացնում ու երանգավորում են հայ տնտեսագիտական մտքի պատմությունը: Մեզ հետաքրքրող հարցի տեսակետից առանձնացնենք երկու պարբերական՝ «գավառական-դեմոկրատական» ուղղության¹ հարող Վ. Պապաջանյանցի «Պսակ» շաբաթաթերթը և Ս. Գուլամիրյանի «Արաքս» հանդեսը: Նախ նկատենք, որ չի կարելի ստույգ համարել «Հայկական սովետական հանրագիտարանում» տրված այն անվերապահ բնորոշումը, թե «Արաքսն» «ունեցել է լիբերալ-բուրժուական ուղղություն»²: Դրանում համոզվելու համար բավական է թեկուզ վկայակոչել հանդեսի կարծիքը Գրիգոր Արծրունու մասին, վերջինիս նվիրված մահախոսականում. «Ինչքան էլ նրա գաղափարները հայ կյանքին հարմարվելով»³ լուրջ քննադատության չդիմանան, ինչքան էլ նրա դատողությունները մի քանի հասարակական խնդիրներում բոլորովին սխալ տրամադրության վրա հիմնված լինեն, այնուամենայնիվ, նորա քարոզները միշտ գրավել են երիտասարդությանը ոչ այնքան նոցա սխալ եզրակացություններով, որքան նոցա հիմքը կազմող գեղեցիկ ճշմարտություններով»³:

«Արաքսը» չէր հավանում ուղղություն տալու գաղափարական ամբողջական սիստեմ ենթադրող հասարակական ուրույն հոսանքի: Նրանում կարելի է հանդիպել և՛ լիբերալ-բուրժուական, և՛ ազգային-պաշպանողական, և՛ ազգային-դեմոկրատական մտայնություններին հարող հայացքներ, որոնց սահմաններում էլ այն անդրադարձել է Անդրկովկասի սոցիալ-տնտեսական զարգացման հեռանկարի հարցերին:

XIX դ. վերջին քառորդում երկրամասում կապիտալիստական հարաբերությունների զարգացումը հանգեցրեց մանրգյուղացիական տնտեսության քայքայմանն ու գյուղի դասակարգային շերտավորմանը: Ծանրացավ ամենաբաղձամարդ դասակարգի՝ գյուղացիության, տնտեսական ու սոցիալական վիճակը: Ահա այս պարագաներում է, որ ռուսական նարոդնիկների հետևողությունը, հայ գյուղի բարեկարգման առաքելության մասնակցությունը է գալիս այսպես կոչված «ժողովրդասիրական շարժումը»: Ըստ էության մանրբուր-

¹ «Հայ նոր գրականության պատմություն», հ. 3, Երևան, 1964, էջ 35:

² «ՀՍՀ», հ. 1, Երևան, 1974, էջ 703:

³ «Արաքս», 1892, գիրք «Բ», էջ 11:

ժուական այս գաղափարախոսությունը հակակապիտալիստական բովանդակություն ունի և միտում էր համայնքի վրա պատվաստել մի ուրույն գյուղացիական սոցիալիզմ: Հատկապես պատմական մեծ առաքելություն էր վերադրվում մտավորականությանը: Հենց այս պատմական դերն էր պատվիրում «Պակի» խմբագիր Վ. Պապաջանյանցը՝ Մոսկվայի մի խումբ հայ ուսանողների ուղղած պատասխան նամակում: «Բայց մասնավոր անձինք,— գրում էր նա,— «Ծս, «Դու», «Նա» կարող ենք գործել, առնել, երբ բարձրանալով ընդհանուրի միջից, կծառայենք մեր մասնավոր գործունեությանը ընդհանուրի բարօրության, բարգավաճության ու լուսավորության մեծ գործին և կգործենք նպատակահարմար, երբ կծուվենք հասարակ ժողովրդի հետ, երբ մեր անձնավորության ու հասարակ ժողովրդի մեջ կլինի մեկ անխզելի կապ ու կենդանի կապակցություն»⁴: Հազիվ թե Ս. Պապաջանյանցը միտում ունենար նրանց դարձնելու «համայնական սոցիալիզմ» իսկական գաղափարախոսներ, սակայն ակնհայտ է հայ իրականության սոցիալ-տնտեսական կառուցվածքի բաղադրամասերում ագրարային հարաբերությունների դեմոկրատական վերափոխությունների նրա առաջնային ծրագիրը: «Գյուղացին մեր ազգի արյունն ու մարմինն է», ուստի և անհրաժեշտ է նրան փրկել քայքայումից: «Հասարակ ժողովուրդը,— շարունակում է Ս. Պապաջանյանցը,— մեկ ազգի, իսկ ընդհանուր հասարակ ժողովուրդը մարդկության հասարակական շինվածքի հիմքն է: Նա ծնողն է բոլոր մեկ ազգին պատկանող դասակարգերի, սա այն առատ ու պարարտ հողն է, որ ուր որ ինչ ցանես, այն և անշուշտ կհնձես: Սոցանից է կախ. բարգավաճություն, բարօրություն մեկ ազգի կամ ընդհանուր մարդկության»⁵:

Սոցիալական այս նույն փիլիսոփայությունն էր հետամտում նաև «Արաքսը»՝ հողի զորության հետ կապելով հասարակական դարգացման տնտեսական ու քաղաքական շրջադարձային անցումները: «Բայց թե որքան մեծ է հողի ուժը,— գրում էր հանդեսը,— ոչ միայն նեղ տնտեսական կյանքի մեջ, այլև ամենամեծ քաղաքական հարցերում, այդ դժվար է մինչև անգամ կարճ կերպով նկարագրել: Հիշենք միայն, որ հողի տիրապետության հարցը, կամ հողային հարաբերությանց անբավականացուցիչ ձևը և ուրիշ երևույթների հիմքն եղել են պատմական ամենամեծ գործողությունների, անթիվ պատերազմների, հեղափոխությունների և շատ ազգերի ոչնչանալու պատճառը»⁶:

«Հողի իշխանություն» ժողովրդասիրական այս դիտողությունները տնտեսական զարգացման բնագավառում առաջադրում էին «գյուղացիիչ» բազմաթիվ նախագծումներ: Նշվում էին գյուղի տնտեսական վերաձևումների ու բարեկարգման բազմաթիվ ուղիներ, դրանց իրականացման հետ կապելով գյուղացիության սոցիալական առաջընթացի հեռանկարը: Կարծես կրկնելով նարոդնիկների այն պահանջը, որ երիտասարդությունը «ծառայելով ժողովրդին» պետք է «փակեր իր պարտքերը» և իրականացներ սոցիալական արմատական վերափոխումներ, Վ. Պապաջանյանցը գրում էր, որ «հարկավոր է մեզ տեղական հանգամանքները քննադատության ենթարկել, դավառները ուսումնասիրել, խեղճ թշվառ գյուղացուն սիրել ու պաշտպանել: ...Ուսումնասիրելով գավառներն ու տեղական հանգամանքները, ջանանք մատնացույց լինել այնտեղի վնասավոր ու օգտաբեր երևույթների վրա, առաջինը աշխատել գուրս մղել նոցա կյանքից, իսկ երկրորդը ներս տանել նոցա կյանքի մեջ»⁷: «Բնական»,— կարդում ենք «Արաքսում»,— գիտուն և տնտեսագետ անձնավորության պետք ունինք, որը երկրին չորս կողմը ճամբորդելով, ժո-

⁴ «Պակ», 1880, № 1:

⁵ Նույն տեղում:

⁶ «Արաքս», 1888, գիրք «Բ», էջ 9:

⁷ «Պակ», 1880, № 1:

դուրդի վիճակն ուսումնասիրեն, թշվառության բուն գաղտնյաց թափանցեն և պաշտոնապես կարող լինեն իրենց ըմբռնած եղանակով հիմնական բարեփոխումներ ի գործ դնել⁸։ Կապիտալիզմի ներթափանցումներից հեղաբեկվող գյուղի սոցիալական հակասությունները վերացնելու այս միտումը, ինչ խոսք, ուսողական էր. երիտասարդությունն արդյո՞ք կարող էր իրականացնել տնտեսական վերափոխությունները, որտեղի՞ց պիտի վերցնե՞ր ահրաժեշտ նյութական միջոցները, որտեղի՞ց էր սկսվում և որտե՞ղ վերջանում նրա տնտեսական ու սոցիալական գործունեության շառավիղը և այլն, և այլն։ Սկզբունքային նշանակություն ունեցող հարցեր են սրանք, որոնք լուծումներ չեն ստացել ո՛չ «Պսակի» և ոչ էլ «Արաքսի» էջերում։

Սոցիալական հարցն ըստ «Պսակի» որքան պատմական, նույնքան և համասրդակյին է, որը միշտ էլ ծառացել է մարդկության առջև՝ նրա զարգացման բոլոր փուլերում։ Որտեղ կա անարդարություն ու բռնություն, այնտեղ էլ կա սոցիալական հարց։ «Սոցիալական մտքերը,— գրում էր շաքաթաթերթը,— տիեզերքի, ամբողջ մարդկության սեփականությունն է, և ոչ թե առանձնապես մեկ երկրի կամ մեկ ազգի. ինչ տեղ կա կյանք, այնտեղ կան սոցիալական մտքեր, ինչ տեղ կա անիրավացի բռնություն, հացի կարոտություն, չքավորություն, այնտեղ էլ կարեկցություն, մարդասիրություն⁹։ Խախտվել է մարդու և բնության սկզբնական ներդաշնակությունը, հասարակության համաշափությունն ու միասնությունը, առաջ են եկել ճնշողներ ու ճնշվողներ։ Մարդու համար, իբրև հասարակական անհատի, ստեղծվել է մի խիստ անբնական վիճակ։ «Անսոված ստեղծեց երկինք ու երկիր,— գրում է Ս. Պապաջանյանցը,— արեգակն ու աստղերը, ջուրն ու ցամաքը, բույսն ու անասունը և վերջը մարդը, իր պատկերին մարդը, որին հանձնելով՝ բոլորն այս, ասաց «աճեցե՛ք և բազմացա՛րուք»։ Նա տվեց մարդուն և ոչ Աղային»¹⁰։ Ս. Պապաջանյանցը մտորումներ է անում բնության ու հասարակության վերաբերյալ և փիլիսոփայական հայտնի ուսմունքների փորձով բացատրում այդ օրգանական ամբողջությունների ներքին կապերը։ «Անհատը առանձին, մասնավորապես վերառած,— գրում է նա,— անուժ է, ժամանակավոր է, ինչպես և բնության մյուս իրերի անհատները նա առանձին-առանձին վերառած կորցնում է իր բարոյական նշանակությունը, իսկ հասարակական կապակցության մեջ, առանց ոչնչանալու անհատականությունը, այլ միայն բաց թողնելով մասնավորությունը, կազմում է մի ներդաշնակավոր ամբողջ բոլորի ցանկալի միավորությունը դուրս ետեցնելու համար։

Ինչպես անբան աշխարհում՝ ամբողջության մասերի զարգանալուց ու աճելուց ամբողջի մեծությունն է պայմանավորված, նույնպես բնական աշխարհում՝ անհատների զարգանալուց ու աճելուց՝ մեկ ընկերության կամ մեկ ազգի մեծությունն է կախ։ Մեկ ազգ կամ մեկ ընկերություն հասած է իր կատարելության, երբ նորա մասերը, անհատները հասած են իրենց ամենավերջին զարգացմանը ու աճմանը։ Ինչպես անբան աշխարհում իրերի անհատների պարտ ու պատշաճ զարգացումից ու աճումից գոյանում է իրի ներդաշնակավորություն ու կանոնավորություն, նույնպես բնական աշխարհում մեկ ընկերության կամ մեկ ազգի ներդաշնակավորությունը նորա անհատների կանոնավոր զարգացումից ու աճումից է կախ»¹¹։

Ինչպես տեսնում ենք, հասարակությունը, ավելի շուտ ամբողջ մարդկությունը, Ս. Պապաջանյանցին ներկայանում էր որպես օրգանական ամբողջություն։ Նա ընդունում էր վերջինիս առանձին տարրերի՝ անհատների, ազգերի, ընկերությունների ինքնազարգացումը, դրան առնչելով ամբողջ մարդկության զարգացումն ու կատարելությունը։ Սակայն, կարծես ամբողջը հան-

8 «Արաքս», 1890, գիրք «Ա», էջ 31։

9 «Պսակ», 1880, № 3։

10 Նույն տեղում, № 1։

11 Նույն տեղում, 1882, № 2։

գեցնելով մասերի մեխանիկական գումարի, Ս. Պապաջանյանը, այնուամենայնիվ, գերազանահատում էր ամբողջի դերը, գտնելով, որ այն գերիշխում է մասերի վրա՝ պայմանավորելով վերջիններիս զարգացման ընդհանուր ուղղությունը: «Մարդկությունը ամփոփում է բոլորը,— գրում է նա,— սա է ամբողջությունը, որեմն և կատարելությունը: Մարդկությունն ասացյալը է այն մեծ ուժը, այն կենդանի միավորությունը անհատների, որ առանց նորան, կամ նորանից դուրս, մասնավոր մարդը լինում է մեկ անօգուտ, և աննշան էակն»¹²: Սա մյուս կողմից էլ ուղղված էր բուրժուական տեսաբանների այն մտայնության դեմ, ըստ որի անհատը հասարակությունից մեկուսացված և ներփակված էակ է: Կ. Մարքսը նշում է, որ անհատները, ինչպես ֆիզիկապես, այնպես էլ հոգեոր առումով ստեղծում են մեկը մյուսին¹³, որ անհատի զարգացումը պայմանավորված է բոլոր մյուս անհատների զարգացմամբ, որոնց հետ նա գտնվում է ուղղակի կամ անուղակի շփման մեջ¹⁴:

Որքանով ընդհանրության առանձին տարրերի սոցիալական վիճակով է պայմանավորված ամբողջ մարդկության սոցիալական վիճակը և որքանով ներհակությունները «Պսակին» ներկայանում էին ոչ թե որպես «ընդհանուր օրգանական», այլ «տեղական» բնույթի հակասություններ, ուստի և շարաթաթերթը դրանց լուծման համար առաջադրում էր «համադեմոկրատական» բնույթի միջոցառումներ, որոնք իրենց ընդհանրության մեջ տեղադրվում էին ժամանակի հասարակական մտայնության ոլորտներում: Այդ միջոցառումներն էին. «հացի շտեմարաններ» բացել երաշտի տարիներին գյուղացիության կարիքների բավարարման համար¹⁵, եվրոպական երկրների և Ռուսաստանի տնտեսության փորձով «օրինակելի ֆերմաներ» ստեղծել, որ հնարավորություն կտա ներդնելու կատարելագործված արտադրության միջոցներ և նոր արտադրաձևեր¹⁶, պարբերաբար կադմակերպել ցուցահանդեսներ ու գյուղացիությանը հաղորդակից դառննել գիտության ու տեխնիկայի նորույթներին¹⁷, վերացնել սակավահողությունը՝ մանր գյուղացիական տնտեսությունները զարգացնելու և վարձակալական հարաբերությունները վերացնելու համար¹⁸, «փոխատու-խնայողական» ընկերություններ հիմնել էժանազին վարկ տալու նպատակով¹⁹: Այդ ամենից առաջ, իհարկե, անհրաժեշտ էր լուսավորել գյուղացուն, նրան ծանոթացնելով «առավել արդյունաբեր տնտեսության օգուտների և իսկության հետ», «էժան և հանրամատչելի գրված գրքերի» և աշակերտներին գյուղատնտեսության վերաբերյալ տեղեկություններ հաղորդելու միջոցով և այլն²⁰: Թերթը սակայն առանձին նշանակություն էր տալիս գյուղական վարկին: Հետեւելով տնտեսագետ Ֆ. Ֆլիտին, Գ. Նրդնկյանը «Գյուղական կրեդիտ» հոդվածում խորհրդածություններ էր անում վարկի բարեմասնությունների մասին: «Կրեդիտը (փող փոխառնելու միջոցը),— գրում էր նա,— մարդուս կանոնավոր տնտեսական կյանքի ամենաանհրաժեշտ պայմաններին է պատկանում: Եվ արդարև, յուրաքանչյուր արտադրող, լինի նա վաճառական, գործարանատեր, կավվածատեր կամ գյուղացի, շատ քիչ բացառությամբ, չի կարող բավականանալ սեփական միջոցներով, սեփական դրամադրութենով»²¹: Հետաքրքրական է, որ հեղինակը հատկապես կարևոր էր դիտում դրամազխի արտադրողական կիրառումը, որը ոչ միայն «ծածկում է

¹² Նույն տեղում:

¹³ К. Маркс и Ф. Энгельс, Соч., т. 3, с. 36.

¹⁴ Նույն տեղում, էջ 440:

¹⁵ «Պսակ», 1880, № 17:

¹⁶ Նույն տեղում, № 19:

¹⁷ Նույն տեղում, 1881, № 6:

¹⁸ Նույն տեղում, 1882, № 17:

¹⁹ Նույն տեղում, № 15:

²⁰ Նույն տեղում, 1881, № 6:

²¹ Նույն տեղում, 1882, № 14:

տոկոսը», այլև շահ է բերում, իսկ սպառողական նպատակով վարկի կիրառումը համարում էր «վնասակար»²²։ Ինչ խոսք, որ վարկը որոշակիորեն նպաստում է արտադրողական ուժերի զարգացմանը, բայց և մյուս կողմից այն հանգեցնում է կապիտալիստական հարաբերությունների սրմանը։ Վարկի վերաբերյալ Գ. Նրդնկյանի դիտողությունները եզրեր էին որոնում «վարկային կոոպերացիայի» տեսության հետ։ Գյուղատնտեսության մեջ վարկային կոոպերացիան հատկապես լայն տարածում ունեւր Գերմանիայում, որի նախաձեռնողն էր Ռայֆայզները։ Ռուսաստանում կարճատև վարկի բարեմասնությունները պրոպագանդում էին նարոդնիկները։ Դա մանրթուրժուական ուսուպիա էր, որը ենթադրում էր կանխել գյուղացիության քայքայումը և կապիտալիստական հարաբերությունների զարգացումը գյուղում։ Բանն այն է, որ փայտախրական հիմունքներով կազմակերպված այդ վարկային կոոպերացիայի միջոցները կազմավորվում էին նրա անդամների մուծումների հաշվին։ Գյուղացիական ջրավորությունն ըստ էության հնարավորություն չունեւր փայտեր դառնալու, ուստի և կոոպերացիայի անդամ ունեւր խավը, որի ձեռքում կենտրոնացված էին նյութական լծակները, այն պետք է օգտագործեր իր շահասիրական նպատակների համար, դարձնելով այն շահագործման «կապիտալիստական կոլեկտիվ հիմնարկություն»²³։ «Պսակի» մի այլ հեղինակ նույն դիրքերից տնտեսական զարգացման կարևորագույն պայմաններից մեկն էլ համարում էր ընկերական ոգու դաստիարակությունը։ Ամեն մի լուսավորված ու քաղաքակրթված երկրի ու ազգի մեջ,— գրում է Բ. Տ. Գ.— երբ անհատական ուժը բավականանում չի մի գործ առաջ տանելու ու գլուխ ածելու համար, միանում են մի քանի անհատներ, կազմում են մի ընկերություն և ապա միասիրտ ու միակամ սկսում են գործել ու աշխատել այդ գործի կատարելության ու առաջադիմության համար», ուստի և «մեր ազգի համար անհրաժեշտ են հողագործական և արհեստական ընկերությունների գոյությունը և որքան շատ լինի, նույնքան և մենք մոտ կլինենք և շուտով կհասնենք մեր նպատակին»²⁴։ Ինչպես տեսնում ենք «Պսակը» հասարակական զարգացման իր իդեալը կառուցում էր հողագործական և արհեստակցական կոոպերացիաների վրա։ Կ. Մարքսը բազմիցս շեշտել է, որ կոոպերացիաների միջոցով անհնար է սոցիալական խոշոր վերափոխումների կատարել, որ կոոպերատիվ աշխատանքը սկզբունքով ինչքան էլ գերակշռող լինի և գործնական տեսակետից օգտակար, այնուամենայնիվ, ի վիճակի չէ կասեցնելու երկրաշափական պրոգրեսիայով աճող մոնոպոլիային և ոչ էլ ազատագրելու մասնաներին կամ նույնիսկ թեթևացնելու աղքատացման ծանրությունը²⁵։

«Պսակն» ընդհանրապես հակված էր սոցիալական հարցի լուծումն իրականացնել առանց հասարակական ցնցումների։ «Ժամանակակից քաղաքական անցքերի վերա» հորվածում, անդրադառնալով ռուսական նիհիլիզմին և այստեղ իսկ հակադրվելով «Գոլոսի» բնութագրությանը, թերթը գրում էր, թե «Հայտնել «Գոլոս» լրագրի կարծիքի նման մի կարծիք, կնշանակի, մեր կարծիքով, ժողովրդի գլխի տակը կակուղ բարձ դնել, քնացնել նորան, լծողնել, որ նա իր պատրաստություններն տեսնի բոլորիս սասանեցնող ու ամենայն ինչ հիմն ի վեր տապալող կուսակցությունների ու ընկերակցությունների առաջն առնելու համար»²⁶։ Ակներև է, որ «Պսակը» սոցիալական վերափոխությունների հիմնական ուղին համարում էր ռեֆորմը։

Տնտեսական զարգացման հեռանկարը կապելով մանր կոոպերատիվ արտադրության հետ, «Պսակը», այնուամենայնիվ, ուշադրություն էր հրավիրում երկրամասի արդյունաբերական առաջընթացի տնտեսական հետևանք-

²² նույն տեղում։

²³ Վ. Ի. Լենին, Երկեր, հ. 33, էջ 562։

²⁴ «Պսակ», 1881, № 5։

²⁵ К. Маркс и Ф. Энгельс, Соч., т. 16, с. 10.

²⁶ «Պսակ», 1880, № 3։

ների վերլուծությանը, զբաղվելով տնտեսական զարգացման օրենքների բացատրության մեջ: Նրա համոզմամբ «Ճշմարիտ տնտեսության» սկզբունքների խմացությունը հնարավորություն կտար որոնելու «նահապետական դրուստությանից» կատարելագործված արտադրաձևերի անցնելու միջոցներ: «Մեզանում,— գրում էր «Պսակը»,— ո՛չ հողագործը և ոչ արհեստավորը, ո՛չ վաճառականը և ոչ գրաստանը գիտեն թե ինչ է և ինչու մեծ է կայանում իսկապես հարստությունը, չգիտեն ինչ է աշխատանքը և ինչ դեր է խաղում ընդհանրապես նա տնտեսության մեջ, չգիտեն նաև ինչ է աշխատանքի բաժանումը և թե աշխատանքի բաժանմունքով և կատարելագործվում է ինչպես արհեստը, նույնպես և մեծ աշոգականություն է ստանում բանվոր մշակը: Զգիտեն, որ մենք պարտական ենք աշխատանքի բաժանմունքին, որ արհեստները արդի ծաղկյալ դրուստության մեջ են, չգիտեն, որ եթե չլինեք աշխատանքի բաժանմունքը, անհնարին կլինեք զավորներում կամ ֆաբրիկաներում ստանալ կարճ միջոցում իրերի այն ահագին քանակությունը, որ այժմ ստացվում է:

Ուրեմն հայր, որ այսպիսի անհաշողության և տնտեսական հետադիմության մեջ է, գլխավորապես նորանից է, որ նա հասկացողություն չունի ճշմարիտ տնտեսության մասին, որ նա ծանոթ չի տնտեսական սկզբունքների հետ, որ նա հետևում չի ժամանակին, փորձին, գիտությունը»²⁷, Թեև թերթը հետագայում չի անդրադառնում նշված հարցերի հանգամանալից քննությանը, այնուամենայնիվ ակներև է, որ առաջադրված հարցերը բխում էին կապիտալիստական արտադրության ուղին թևակոխած երկրամասի տնտեսական զարգացման օբյեկտիվ պահանջների հաշվառումից:

Եթե «Պսակը» տնտեսական հարցերի իր արժարժումներում դիտարկողապես անդրադարձել է գյուղատնտեսության հարցերին, ապա «Արաքսին» առավելապես հետաքրքրում էին երկրամասի արդյունաբերական զարգացման պրոբլեմները: Հայտնի է, որ անցյալ դարի երկրորդ կեսին արտասահմանյան կապիտալն արդեն լայնորեն մուտք էր գործել Անդրկովկաս: Նշելով, որ տնտեսության ճյուղերում այն արդեն տիրապետող է դարձել, հանդեսը պահանջ էր դնում սեփական ուժերով կազմակերպել բնական հարստությունների արդյունաբերական մշակումը: «Տնտեսական խորհրդածություններ» հոդվածի հեղինակը (ստորագրված է Ա.Ս.) գրում է. «Մեր հայրենիքը առհասարակ և Կովկասը, մասնավորապես, անկասկած շատ հարուստ և առատ երկիր է իր աշխարհագրական դրությամբ..., բայց մի երկիր, մի ժողովրդի հարստությունն ոչ թե նորա բնական հարստություններն, կամ նորա արհեստի և տնտեսական արդյունք արտահայտությունն է: Ոչ, երկիրը կարող է հարուստ լինել, իսկ ժողովրդը դարձյալ աղքատ. երկիրը կարող է լինել առատ գործարաններով և արհեստանոցներով, իսկ բաղդը դարձյալ հեռու նորա ժողովրդից: Գուցե փոքր ինչ անբնական երևա այսպիսի դատողությունը, բայց մի խոսքն այն դեպքի վերա է, երբ մի որևէ երկրի բնիկ ժողովրդը մասնակից չէ այդ երկրի հարստությանը, երբ արհեստը և արդյունաբերությունը նորա սեփականությունը չեն, այլ օտարինը...»²⁸, Հոդվածի հեղինակը հիշեցնում է XVIII դ. ուստ տնտեսագետ Ս. Պոսոշկովին, որը հակառակ մերկանտիլիստների, երկրի հարստությունը պայմանավորում էր ոչ թե գանձարանում եղած աղնիվ մետաղների քանակությամբ, այլ ժողովրդի հարստության աստիճանով, որին կարելի է հասնել նյութական արտադրության ճյուղերի զարգացման միջոցով²⁹: Հայ տնտեսագետը կարծես լրացնում է Ս. Պոսոշկովին, երկրամասի հարստությունների մշակման գործում վճռական նշանակություն հատկացնելով տեղական նախաձեռնությունը,

²⁷ Նույն տեղում, 1881, № 18:

²⁸ «Արաքս», 1888, գիրք «Բ», էջ 10:

²⁹ С. Т. Посошков, Книга о скудности и богатстве, М., 1951, с. 13—14.

տնտեսական շրջանակների մեջ ժողովրդական լայն խավերի ընդգրկմանը: Հապաղումը ճակատագրական վրիպում կարող է լինել ազգի հետագա զարգացման համար, քանի որ «հեռու չէ այն ժամանակը, երբ այդ հարստությունն էլ կխլեն մեր ձեռքից օտար եվրոպացի գումարատերերը, իսկ մենք այդ գործում կընդունենք ամենաթանր և ամենավատ դերը, այսինքն բանավորների դրուժյուն կըռնենք, իսկ շահը և աշխատանքը մեր ձեռքից կխլեն»³⁰:

Երկրամասում արտադրողական ուժերի զարգացումը պահանջում էր մեծ կապիտալներ: Անհատական կապիտալների սահմանափակությունը չէր կարող բավարարել ընդլայնվող վերարտադրության պահանջները: Այս հակասությունը վերացնելու և օտար կապիտալներին դուրս մղելու համար «Արաքսը» կարևոր տեղ էր հատկացնում «ընկերական ոգու» դաստիարակությանը, որպես տնտեսական կյանքում «բարոյական» և «գործնական» որոշիչ նշանակություն ունեցող գործոնի³¹: «Ոչ մի երկրում,— դրում է հանդեսի տեսաբանը,— սկսած ամենափոքրից մինչև ամենահարուստ եվրոպական տերությունը, երբեք մեծ գործեր չեն կատարվում միակ մարդկանց հարստությամբ, այլ որքան էլ որ մեծ գումարատերեր լինեն գործ ձեռնարկողները, նոքա միշտ աշխատում են կազմել ընկերություն, որովհետև այդպես ավելի հաստատ գործ կարելի է հիմնել և յուրաքանչյուր ընկերակցի դրամաբաժինն ավելի ապահով կլինի: Գումարատերեր մարդիկ շատ առգամ փոխանակ մի որևէ գործ միայնակ սկսելու և ամբողջ ձեռնարկության հաջողությունը կամ վնասն իրենց վիզն առնելու, ավելի գործնական են համարում միևնույն գումարը զետեղել մի քանի ձեռնարկությունների մեջ, որոնցից յուրաքանչյուրը ընկերակցական սկզբունքի վրա է հիմնված: Գործնական օգուտը պարզ է. եթե մի ձեռնարկություն վնաս է տալիս, փոխանակ ամբողջ վնասը իր վերա առնելու, ընկերակիցը կրում է միայն նորա այն մասը, որը համապատասխանում է նորա դրամաբաժինին. իսկ մի ուրիշ ձեռնարկության մեջ, որտեղ դարձյալ բաժին ունե, օգուտ է ստանում»³²:

Հայ տնտեսագետն ակնհայտորեն չէր նկատում ընկերակցական հիմունքներով կազմակերպված փայտերերի ներքին հակասությունները, փայտափրական ընկերությունը ներկայացնելով որպես ներդաշնակ ասոցացիա: Մինչդեռ իրականում ակցիոներական ընկերություններն այն հիմքն են, որի վրա խարսխվում են արտադրության հասարակական բնույթն ու կապիտալիստական հակասությունների սրումը: Արտադրության կազմակերպման ակցիոներական ձևը որոշակի փոփոխություններ է առաջ բերում սեփականատիրական հարաբերություններում: «Այս,— գրում է Կ. Մաքսը,— կապիտալի, իբրև մասնավոր սեփականության, վերացումն է արտադրության բուն իսկ կապիտալիստական եղանակի սահմաններում»³³: Այս իրողությունը չկռահելուց է, որ հանդեսի տեսաբանը հասարակական ներհակությունները կապում էր անհատական խոշոր կապիտալների առկայության հետ: Ուստի, նրա կարծիքով, եթե տնտեսական զարգացումը չիրականացվի ակցիոներական սկզբունքներով, «իրերի դրությունը համարյա թե միևնույնը կմնար, այն զանազանությամբ միայն, որ օտար կապիտալիստի տեղ կլիներ մեր բնիկը, որի անձնական շահերը միևնույն կերպով կարող էին ճնշել ընդհանուր ժողովրդական շահերը»³⁴: Այս իմաստով նա ընկերակցական սկզբունքների արմատավորումը կարևոր էր համարում նաև գյուղատնտեսության մեջ, Գերմանիայում և Ռուսաստանում գործող այդպիսի ընկերությունները, նրա կարծիքով, գործում են «ամենքը յուրաքանչյուրի համար, յուրաքանչյուրը ամեն-

30 «Արաքս», 1888, գիրք «Բ», էջ 11—12:

31 Նույն տեղում, էջ 17:

32 Նույն տեղում, էջ 14—15:

33 Կ. Մաքս, Կապիտալ, Կ. 3, մաս I, Երևան, 1947, էջ 426:

34 «Արաքս», 1888, գիրք «Բ», էջ 15:

քի համար»³⁵ սկզբունքով: Ինչպես արդեն նկատել ենք, սա մանրրորոժուական այն ոտուպիան է, որին հարում էր նաև «Պսակը»:

«Արաքսը» երկրամասի տնտեսական զարգացման համար կարևոր էր համարում արտադրության կատարելագործված եզանակների ներդրումը, գտնելով, որ ապագան «գործարանական արդյունարերությանն» է, որ «կուտուրական առաջադիմության դինը սկսել ենք հասկանալ» և որ դա է զարգացման միակ ուղին: Դրա հետ մեկտեղ ամստսանքով է խոսում արտադրության նահապետական ձևերի՝ մասնավորապես արհեստների կործանման մասին³⁶, մի ինչ-որ տեղ մանր հողատիրոջ աշխատանքը գերադասելով վարձու աշխատանքից³⁷, մի երրորդ դեպքում հնարավոր համարելով տնայնագործական արտադրության հարատևությունը տնտեսական զարգացման նոր իրադրության պայմաններում՝ շեշտելով, որ եթե «ուրիշ երկրներում, առավել Ռուսաստանում առանձին ուղադրություն են դարձնում տնային արդյունարերության վերա, աշխատելով նորան բարձրացնել և զարգացնել, մենք առանց հարգանքի ենք վերաբերվում դեպի նա»³⁸ և այլն:

Ընդհանուր առմամբ սրանք են «Արաքսի» և «Պսակի» տնտեսական հարցադրամները, որոնք իրենց հակասություններով, չափարտվածությամբ ու նմանողականությամբ հանգեցրին, XIX դ. հայ տնտեսագիտական մտքի ուղարավ դրսևորումներից են:

ЭКОНОМИЧЕСКИЕ ВОПРОСЫ В ПЕРИОДИЧЕСКИХ ИЗДАНИЯХ «ПСАК» и «АРАКС»

РОБЕРТ САРИНЯН

Резюме

Основные направления армянской экономической мысли XIX в. соответствовали социально-экономической сущности общественных течений того времени. Вопросы экономического развития освещались в таких органах периодической печати, как «Мшак», «Мегу Айастан», «Нор Дар», «Мурч», «Ардзаганк», представлявших различные общественные направления. Периодические издания «Псак» и «Аракс» не отличались глубоким всесторонним анализом социально-экономической жизни, однако вопросы, затрагиваемые ими, представляют определенный интерес и дополняют историю армянской экономической мысли. В этих органах печати отражены взгляды либерально-буржуазных, национально-консервативных и национально-демократических течений по вопросам развития Закавказья, устранения социально-экономических противоречий общества и др.

³⁵ Նույն տեղում, էջ 16:

³⁶ Նույն տեղում, 1894—1895, գիրք «Բ», էջ 29:

³⁷ Նույն տեղում, 1888, գիրք «Բ», էջ 12—13:

³⁸ Նույն տեղում, 1889, գիրք «Բ», էջ 12: